



SOS DJEČIJA
SELA
BOSNA I HERCEGOVINA

Dragi naši prijatelji, Kumovi i Kume,

Kraj godine je vrijeme koje djeca najviše vole, vjerujući u magiju ostvarenja želja i dobrotu. To je vrijeme u kojem sa vama dijelimo zahvalnost što ste bili dijelom odrastanja, sazrijevanja, velikih i malih pobjeda i uspjeha koje su djeca, mladi i porodice ostvarile. Uz zahvalnost sa vama želimo podijeliti i tople i iskrene želje da u predstojećoj godini budete zdravi, sretni, nasmijani, uspješni i mirni. Želimo da imate divne i posvećene prijatelje, baš kakvi ste vi nama, jer uz bezrezervnu podršku lakše prođemo kroz izazove i poteškoće.

A lako se prevaziđu izazovi kada imaš nekog ko te podržava i voli, ko te čuje bez obzira što ne možeš proizvesti glas, ko ne odustaje bez obzira na sve. To najbolje znaju naše Selma i Erna, dvije sestre koje imaju urođeno oštećenje govora i sluha, ali njihovi SOS roditelji Mirha i Damir, kao i sva braća i sestre u porodici su naučili znakovni jezik. Čitava porodica se prilagodila, ali su to napravili iz želje i ljubavi. Nisu jedini i njihove prijateljice su jednako željele naučiti znakovni jezik kako bi što lakše komunicirale sa ovim iznimno nadarenim i zanimljivim djevojčicama.

Osim što su odlikašice u školi, aktivne na brojnim vannastavnim i edukativnim aktivnostima, svaka ima svoje talente za koje ih mama Mirha potiče da ih dodatno usavršavaju. Erna je prava umjetnička duša, prekrasno crta i vjerovali ili ne, ali mama više nije zadužena za pripremu najboljih kolača na svijetu. Ta titula je pripala Erni.

Selma je pravi sportski tip i na svakom takmičenju u školi ili tokom kampova, uvijek osvaja nagrade. Već uveliko igra folklor u KUD „Seljo“ i njen koreograf kaže da ni kod vrhunskih igrača nije nikada vidio takav osjećaj za takt. Ona čuje kroz vibracije i frekvencije koje su potpuno drugačije od načina na koji smo mi naučili da slušamo i izvanredna je u tome. Svi su oduševljeni njenim talentom, ali i poštovanost. Prosto blista na svakom nastupu. Pored Selme, koreograf je oduševljen pristupom SOS mame Mirhe i to joj je u nekoliko navrata ponovio. Insistiranje na tome da se djeca druže i socijaliziraju, te budu dijelom aktivnosti u zajednici je važan pedagoški pristup koji negujemo. Želimo da se Selma osjeća snažnom i potpuno integrisanom u zajednicu. Uz članove njene SOS porodice i njena najbolja prijateljica Elma je naučila znakovni jezik i pomaže joj u komunikaciji sa drugima.

Rezultati su tu, jer istinsko povezivanje sa djetetom ima moć promijeniti svijet. Selmin i Ernin svijet je možda uskraćen za zvuke, ali je ispunjen bojama, najljepšim mirisima, ljubavlju, toplinom i dobrotom. Odnosi i veze koje stvaramo s drugima u djetinjstvu igraju ključnu ulogu u oblikovanju onoga što postajemo, pomažući nam da razvijemo povjerenje i životne vještine koje nosimo dalje u odraslu dob. Upravo čvrste i dugoročne veze pružaju emotivnu sigurnost koja je neophodna kako bismo napredovali i postali najbolja verzija sebe.

Nakada nam život uskrati nešto što nekom drugom da.

Kažu da ljubav može promijeniti svijet. Selma i Erna nas u to svakog dana iznova uvjeravaju. Ljubav kojom su okružene učinila je da njihove rane zacijele, a svjetovi uistinu budu obojeni najvedrijim bojama.

Vaša ljubav i podrška nam svakog dana dokazuje kako udruženi možemo mališanima biti njihova mirna luka i vjetar u leđa kada ga trebaju. Stoga hvala za sve što za njih činite, neizmjereno se radujemo našem prijateljstvu u godini pred nama.

S ljubavlju,
SOS Dječija sela u BiH



NIJEDNO DIJETE
NE TREBA
ODRASTATI SAMO.

*Zbog zaštite privatnosti
imena su izmijenjena.